



Broj: 01/5-50-1-6-12/07
Sarajevo, 18.12.2007.godine

Z A P I S N I K
12. sjednice Komisije za saobraćaj i komunikacije,
održane 18.12. 2007. godine

Sjednica je održana 18.12.2007., s početkom u 16,10 sati.

Sjednici su prisustvovali članovi Komisije:

- | | |
|----------------------------------|---------------------|
| 1. Branko Dokić, predsjedavajući | 6. Snježana Rajilić |
| 2. Šemsudin Mehmedović | 7. Sadik Bahtić |
| 3. Slavko Matić | |
| 4. Mehmed Suljkanović | |
| 5. Selim Bešlagić | |

Opravdano su odsustvovali: Husein Nanić i Savo Erić.

Iz Javnog RTV servisa BiH sjednici su prisustvovali: Nikola Deretić, predsjedavajući Upravnog odbora, Mehmed Agović, generalni direktor, te Drago Marić, generalni direktor Javnog RTV servisa u 2006.godini. Sjednici je prisustvovao Zijad Sinanović, direktor Sektora za transport i komunikacije Vanjskotrgovinske komore BiH i sekretar Komisije za saobraćaj i komunikacije Ahmed Jalovičić.

Šemsudin Mehmedović je predložio da se u dnevni red pod tačkom 4. c) uvrsti Problem raspodjele CEMT dozvola, što je jednoglasno prihvaćeno.

Predsjedavajući je predložio sljedeći

D N E V N I R E D

1. Usvajanje Zapisnika 11. sjednice Komisije;
2. Prijedlog zakona o izmjenama i dopunama Zakona o osnovama sigurnosti saobraćaja na putevima u BiH - predlagač: Komisija za saobraćaj i komunikacije Predstavničkog doma (prva faza);
3. Razmatranje predloženih zaključaka s 18. sjednice Predstavničkog doma povodom rasprave o tački „Izveštaj o radu i poslovanju Javnog radiotelevizijskog servisa Bosne i Hercegovine za 2006. godinu, s Izveštajem o radu Upravnog odbora“;
4. Tekuća pitanja:
 - a) Smanjenje carinske stope na uvoz tegljača i priključnih vozila i administrativnih taksi na CEMT dozvole – informacija Vanjskotrgovinske komore BiH;
 - b) Upoznavanje sa zaključcima 1. bh. kongresa o putevima, održanog 27. i 28. novembra 2007.godine u Sarajevu.
 - c) Problem raspodjele CEMT dozvola.

Dnevni red jednoglasno je usvojen.

Ad. 1.

Zapisnik 11. sjednice Komisije jednoglasno je usvojen, bez primjedbi.

Ad. 2.

Komisija je jednoglasno podržala principe Prijedloga zakona o izmjenama i dopunama Zakona o osnovama sigurnosti saobraćaja na putevima u Bosni i Hercegovini.

Ad. 3.

Predsjedavajući je predložio da prvo predstavnici Javnog RTV servisa BiH (u daljnjem tekstu: RTV BiH) pruže Komisiji dodatne informacije, a da se poslije toga usaglase zaključci koji će se predložiti Pradstavničkom domu, te da jedan od zaključaka bude održavanje posebne sjednice Parlamenta, na kojoj će se razmatrati mjere koje su potrebne za prevazilaženja stanja utvrđenog revizorskim izvještajima.

Mehmed Suljkanović je podržao održavanje posebne sjednice Parlamentarne skupštine, na kojoj bi se omogućilo i menadžmentu RTV BiH da se obrati poslanicima, a da ima informaciju da će ubrzo biti završen i izvještaj nezavisne revizorske kuće o poslovanju RTV BiH.

Drago Marić je istakao da je rasprava na Predstavničkom domu o radu RTV BiH bila konstruktivna, da je revizija ekspertno konstatirala činjenice o radu RTV BiH, koje su nesporne, ali smatra da je nužno istaći okolnosti koje su dovele do sadašnjeg stanja. Podsjetio je da je RTV BiH počela sa radom u maju 2002. godine, da je u augustu 2004.godine imala 6,5 sati programa dnevno , a da je sa 31.12.2006.godine ostvareno 19,5 sati programa. Ukupan prihod RTV BiH u 2002.godini iznosio je 26 miliona KM, a u 2006.godini 44 milona KM. Njegov cilj kao bivšeg novinara na poziciji generalnog direktora bio je da se sa medijskog aspekta napravi jaka državna televizija. Smatra da je bitno znati da je rad televizije veoma skup, jer osim skupocjene tehnike iziskuje i rad velikog broja zaposlenih, pa istakao da RTV Slovenije ima 2135 zaposlenih, RTV Hrvatske 3200 i RTV Srbije 3850, a da trenutno RTV BiH ima 980 zaposlenih. Što se tiče gledanosti, ukazao je na činjenicu da su Bosni i Hercegovini najgledanije inostrane televizije, da sada imamo registrirane 43 TV kuće, a primjera radi u Hrvatskoj svega 9. Što se tiče donacija, istakao je da su bile isključivo u materijalnim sredstvima, a da su donatori nadgledali njihovu implementaciju. Kadrovska struktura zaposlenih je apsolutno tačna i to je struktura koja je zatečena, a da su isključivo novoupisani bili novinari.

Mehmed Agović je ukazao da je u skladu sa zakonom nezvisna revizorska kuća izvršila reviziju poslovanja za 2006. godinu za sva tri emitera i će taj izvještaj biti dostupan javnosti početkom janura 2008. godine. Što se tiče preporuka državne revizije, istakao je da je završena izrada svih potrebnih internih akta, koji su usaglašeni sa sindikatom i dostavljeni su Upravnom odboru na usvajanje. Mišljenja je da se do kraja 2008. godine mogu rasčistiti sve uočene nepravilnosti, izuzev onih koji se odnose na uspostavu Javnog RTV sistema Bosne i Hercegovine (u daljnjem tekstu : Sistem). Sistem je u krizi zbog dugog čekanja, mora se hitno uspostaviti Korporaciju javnih RTV servisa BiH (u daljnjem tekstu : Korporacija), koja je integrativno tkivo među emiterima, ta da je potrebno sačiniti preciznu i konstruktivnu analizu i definisane prijedloga finansijske konsolidacije Sistema. Oprema RTV BiH je zastarjela, svakodnevno prestaju sa radom mašine za koje nema rezervnih dijelova, a za prelazak na digitalnu tehnologiju trebaće ogromna sredstva. RTV taksa u iznosu od 6 KM nije dovoljna za rad tri RTV servisa, taksa je ista već 8 godina, unatoč zakonskoj obavezi da se taksa treba usklađivati sa inflacijom. Istakao je da je pripremljena strategija marketinškog djelovanja Sistema, da je potrebno što prije završiti reformu Sistema, kao i a sačiniti program finansijske stabilizacije javnih emitera.

Nikola Deretić je istakao da je već završen niz akata na koje je upozorila revizija, ali da i dalje ostaje neriješen problem marketinga, pa je neophodno preduzeti sve raspoložive mjere kako bi se onemogućio

monopol marketinških agencije. Pregovori sa Federalnom televizijom oko dugovanje nisu donijeli rješenje ovog problema, tako da će najvjerojatnije ovo pitanje riješavati sud.

Predsjedavajući se zahvalio predstavnicima RTV BiH na datim informacijama, te istakao da je potrebna cjelodnevna sjednica Parlamenta i da bi Komisija trebala dati smjernice u kojem pravcu će se odvijati ta sjednica.

Mehmed Suljkanović je mišljenja da se ni u kom slučaju o ovome ne može raspravljati na sljedećoj sjednici Predstavničkog doma, te da Komisija ne bi trebala danas raspravljati o zaključcima, pa predlaže da se zaključci dostave klubovima poslanika, kako bi se o njima izjasnili.

Snježana Rajilić je podržala održavanje cjelodnevnih posebnih sjednica oba doma Parlamenta o RTV BiH, na koju bi se pozvali predstavnici sva tri javne emitera, kao i da je potrebno da menadžment sačini prijedlog mjera za rješavanje stanja u RTV BiH.

Selim Bešliagić smatra da bi Upravni odbor trebao sačiniti plana mjera i zadataka u cilju prevazilažanja ovog stanja, pa da se onda na osnovu te analize organizira posebna sjednica Parlamenta.

Predsjedavajući je mišljenja da ne postoje zakonski uslovi za formiranje Odbora Sistema i Korporacije, da je pozitivno da su sva tri javna servisa odredili svoje predstavnike koji rade na pripremi dokumenata za uspostavu Korporacije. Smatra da bi trebalo prihvatiti zaključak Martina Raguža da Upravni odbor u roku od 30 dana dostavi plan programa i finansijski plan za 2008. godinu, što je u skladu sa Zakonom o Javnom RTV servisu BiH, te predložio sljedeće zaključke:

Upravni odbor treba da dostavi akcioni plan za otklanjanje nepravilnosti koji su navedeni u izvještaju Ureda za reviziju, kao i da dostavi informaciju o već preduzetim mjerama.

Da se dostavi finansijski plan načina naplate dugova koje RTV BiH potražuju od drugih pravnih lica, u skladu sa svim raspoloživim mehanizmima.

Da Upravni odbor dostavi plan kadrovske reforme RTV BiH, obzirom na nezadovoljavajuću nacionalnu i kvalifikacionu strukturu.

Mehmed Suljkanović je mišljenja da nema potrebe donositi nove zaključke, te da prije svega treba staviti akcent na mogućnosti što skorijeg formiranja Korporacije.

Šemsudin Mehmedović je predložio da se prekine sjednica Komisije, zbog ranije preuzetih obaveza članova Komisije, a da je za njega prihvatljiv jedino zaključak Martina Raguža.

Slavko Matić je podržao zaključak Martina Raguža, pa pošto postoji konsenzus oko cjelodnevnih sjednica, predlaže da prije te sjednice Upravni odbor dostavi prijedlog mjera za rješavanje trenutnog stanja sa preciznim zadacima i rokovima.

Nakon provedene rasprave, Komisija je jednoglasno je prihvatila zaključke koje upućuje Predstavničkom domu na usvajanje, i to:

1. Predstavnički dom Parlamentarne skupštine BiH traži od Upravnog odbora Javnog RTV servisa BiH da do 20. januara 2008. godine sačini i dostavi Parlamentarnoj skupštini BiH:

a) Sveobuhvatan plan mjera za prevazilaženja stanja utvrđenog revizorskim izvještajima o finansijskom poslovanju Javnog TV servisa BiH za 2005. i 2006. godinu.

b) Plan programa i finansijski plan za 2008. godinu (u skladu sa članom . 29. stav (1) tačka k. Zakona o Javnom RTV servisu BiH).

2. Predstavnički dom uzimajući u obzir stanje u kojem se nalazi Javni RV servis BiH, smatra da je neophodno održati Zajedničku sjednicu oba doma Parlamentarne skupštine BiH sa jedinom tačkom dnevnog

reda „Poslovanje Javnog RTV servisa BiH i mjere za prevazilaženja stanja utvrđenog revizorskim izvještajima o finansijskom poslovanju Javnog RTV servisa BiH za 2005. i 2006.godinu”.

Sjednica je prekinuta u 18 sati.

Nastavak sjednice je održan 14.1.2008., s početkom u 14,05 sati.

Prisustvovali su članovi Komisije: Šemsudin Mehmedović, Sadik Bahtić, Savo Erić, Mehmed Suljkanović, Selim Bešlagić i Husein Nanić.

Opravdano su odsustvovali: Branko Dokić, Snježana Rajilić i Slavko Matić.

Iz Ministarstva komunikacija i prometa BiH prisustvovali su: Veselin Poljašević, zamjenik ministra i Mirko Šekara, pomoćnici ministra. Sjednici je prisustvovao i sekretar Komisije za saobraćaj i komunikacije Ahmed Jalovičić.

Nastavku sjednice predsjedavao je prvi zamjenik predsjedavajućeg Šemsudin Mehmedović.

Sjednica je nastavljena na 4. tački usvojenog dnevnog reda.

Ad. 4.

a)

Šemsudin Mehmedović je podsjetio prisutne da je u informaciji Vanjskotrgovinske komore BiH navedeno da su administrativne takse za izdate CEMT dozvole u BiH veće u odnosu na zemlje u okruženju.

Veselin Poljašević je mišljenja da su previsoke takse za izdate CEMT dozvole u BiH, a da Ministarstvo komunikacija i prometa može dati samo sugestiju Ministarstvu finansija da se ovo pitanje razmotri. Napomenuo je da su takse za CEMT dozvole značajan prihod budžeta BiH i da iznose oko 3 miliona KM godišnje.

Mirko Šekara je istakao da podržava smanjenje taksi, te ukazao na činjenicu da je u Hrvatskoj razdvojena taksa na CEMT dozvolu i taksa za dnevnik vožnje.

Selim Bešlagić predlaže da Komisija usvoji zaključak da se takse za CEMT dozvole usklade sa taksama zemalja u regiji.

Nakon rasprave, Komisija je usvojila sljedeći zaključak:

Potrebno je da Ministarstvo komunikacija i prometa BiH u saradnji sa Ministarstvom finansija BiH razmotri mogućnost da se iznos administrativne takse za izdate CEMT dozvole u Bosni i Hercegovini uskladi sa taksama za CEMT dozvole zemalja u okruženju.

b)

Komisija je primila k znanju zaključke 1. bh. kongresa o putevima, održanog 27. i 28. novembra 2007.godine u Sarajevu.

c)

Šemsudin Mehmedović je ukazao da je Komisija ranije donijela zaključke u vezi izdavanja CEMT dozvola, te predlaže da se od Ministarstva traži informacija o preduzetim mjerama u vezi zaključaka Komisije, kao i da se Komisiji dostavi izvještaj o raspodjeli CEMT dozvola za 2008.godinu.

Veselin Poljašević je istakao da su u Ministarstvu imali namjeru da se Pravilnik o raspodjeli CEMT dozvola izmjeni i dopuni, ali su procijenili da ne mogu blagovremeno sačiniti novi Pravilnik, pa je raspodjela CEMT dozvola za 2008.godini izvršena u skladu sa starim Pravilnikom, koji se primjenjuje već 10 godina. Napomenuo je da je zbog uložene žalbe na tender, neizvjesno kada će se uspostaviti softver za bazu podataka o raspodjeli dozvola.

Šemsudin Mehmedović je istakao da problem sofvera postoje već tri godine i da ga treba što prije riješiti. Smatra da trenutno nije ravnopravan tretman svih prevoznika, kao i da se važeći Pravilnik ne primjenjuje u potpunosti.

Husein Nanić je ukazao da je čest slučaj da se ciljano raspisuju takvi tenderi za sofvere koji u slučaju žalbe usporavaju realizaciju planiranih aktivnosti, što je nedopustivo.

Mehmed Suljkanović je istakao da problem CEMT dozvola traje jako dugo, često si govorilo i o raznim nepravilnostima, te je potrebno generalno riješiti proceduru raspodjele CEMT dozvola.

Nakon rasprave, Komisija je usvojila sljedeće zaključke:

1. Potrebno je da Ministarstva komunikacija i prometa Bosne i Hercegovine u roku od 10 dana dostavi Komisiji izvještaj o raspodjeli CEMT dozvola za 2008.godinu.
2. Traži se od Ministarstva komunikacija i prometa Bosne i Hercegovine da u roku od 10 dana dostavi Komisiji informaciju o preduzetim mjerama u vezi preporuka usvojenih na 7. sjednici Komisije za saobraćaj i komunikacije, prilikom razmatranja izvještaja o raspodjeli CEMT dozvola za 2007.godinu.

Nastavak sjednica je završen u 14,25 sati.

SEKRETAR KOMISIJE
Ahmed Jalovičić

PREDSJEDAVAJUĆI KOMISIJE
dr. Branko Dokić